

四庫全書

子部

欽定四庫全書

冊府元龜卷九十

宋 王欽若等 撰

帝王部

赦宥第九

唐穆宗以元和十五年正月即位二月丁丑御丹鳳樓  
大赦天下制曰著大明者日也出乎震而見乎離則八  
紘開朗萬象炤煥字大號者風也發厚地如鼓羣動則  
氛蒙盪滌鬱伏舒散王者如日之炤臨故聖躬作而庶

類觀如風之號令故德音降而兆人從朕以寡薄方茲  
嗣服荷天地之眷祐承宗祧之祚運夙夜祇厲懼不克  
周永惟風教之流弊毗俗之疾苦思布濟時之政宜弘  
利物之澤庶有以導迎和氣感致懽心宜申在宥之恩  
用啓自新之路可大赦天下自元和十五年二月五日  
昧爽已前大辟罪已下罪無輕重咸赦除之唯官典犯  
賊及故殺人者不在免限左降官量移近處已經量移  
者更與量移如復資者即任依常調選責授降資正員

官者亦與進改亡官失爵不齒者量加收敘流人及僧尼道士移隸者節級放還及移近處諸色得罪人中如先有勅去縱逢恩赦不在放還之限者亦並與量移若曾任五品已上官者奏待進止左降官及流人先有官者如亡歿各還本官自今日已前曾有痕累禁錮等一切竝與洗滌永惟罔極弓劍不留號奉終天用深哀感應緣山陵制度喪儀禮物宜委中書門下及諸司長官等博詢故實務遵禮度必誠必信副朕哀懷所緣山陵造

作及橋道置頓並以內庫錢充不得輒令科配百姓度支諸州府監院從貞元八年已後至元和十年已前共記欠錢一百一萬五千九百餘貫鹽鐵使諸監院應欠元和十三年已前錢物除準前制䟽理外共欠一百八萬八千六百餘貫石等戶部諸州府從建中三年以後至元和十三年已前應欠在州貧窮并遭水旱逃亡百姓腹內兼連接淮西南賊界并燒劫散去及賑貸百姓錢物五十萬九百餘貫石等京兆府從元和五年已後

至三十年已前欠諸色錢物共四十一萬九千五百餘貫石束等州府監院百姓欠負但在官典所由腹內者一切放免諸州府除京北河南府外應有官莊宅舖店碾磴菜園鹽畦車坊等宜割屬所管官府諸道除邊軍營田處其軍糧既取其正稅米分給其所管田自為軍中資用不合取百姓營田并以瘠薄地迴授百姓濃肥地其軍中如要營田任取食糧健兒不得輒妄招召天下百姓等自屬艱難棄其鄉井戶部版籍虛繫姓名建

中元年已來改革舊制悉歸兩税法久則弊奸濫益生  
自今已後宜準例三年一定兩稅非論土著客居但據  
資產差率其擇刺史縣令宜委門下中書省御史臺官  
有所諳知即具聞薦如贓污殘人當坐舉主權稅之法  
雖合同遵瘡痍之餘姑欲寬假其河北稅鹽宜委度支  
與榷鹽使審細商量具條疏聞奏內外百官食利錢一  
倍至五倍已上節級放免仍每經十年即內外百司各  
賜錢一萬貫充本各據司大小公事閒劇及當司貧富

作等級付應屬諸軍諸使諸司人等在校鄉及坊市鋪  
店經紀者宜與百姓一例差科不得妄有影占如有違  
越所司具屬司并人名奏聞如聞度支鹽鐵院等所在  
影占富商高戶庇人院司不伏州縣差科疲人偏苦事  
轉不濟如有此色仰當日勒歸諸州縣道除正勅率稅  
外不得妄託進奉擅有諸色權率天下州府除兩稅合  
送上都錢物乃所繇常貢外輒不得別進錢物并方鎮  
得替後至城亦不得輒有進獻掖庭籍沒罪人妻子等



宜並放歸親族其諸軍先擒吐蕃生口配在諸處者並放歸國願住者亦聽内外文武見任及致仕官三品以上賜爵一級四品以下加一階諸道諸軍將士等普恩之外賜階爵有差二王三恪文宣王及公主縣主嗣王節級賜與二子官及出身宗子才行者委以名聞奏仍委中書門下量才叙用皇王等已上親皇太后二等已上親並賜階爵武德已來配饗及第一等功臣并張巡許遠南霽雲顏真卿杲卿等尚父子儀贈大尉秀實子

孫中與一子官有差其中有才行堪任臺省者量才叙用中書門下竝諸道節度使諸州府長官東都留守及京常叅官諸軍使等父母祖父母並節級與追贈父母存者與官封已經追贈更與改贈興元奉天功臣及蔡鄆立功將士普恩之外更賜勲爵亡歿者與追贈中書門下及節度等使東都留守度支鹽鐵使京兆尹諸州刺史等賜一子官有差在城諸軍將士節級賞賜仍加階爵京西京北及振武天德八道節給都防禦使下及

神策一十二鎮將士等共一十八萬六千七百餘人都  
賜物一百八萬一千八百餘疋東宮官及侍讀普恩之  
外賜爵加階仍普與進改自國哀及行事命職事官普  
恩之外賜階爵及勲其受顧命撰制誥及冊文并寫制  
誥官等特加一階賜爵一級並賜上柱國優與進改書  
冊官特加一階尊親之禮即展於徽章廣愛之恩宜申  
其慶賜皇太后諸親委中書門下量第等節級優賞文武  
常叅官及外官職事五品已上有母者並加邑號如已

至郡太夫人者許回授周親應緣皇太后冊禮職事官  
並節級賜天下百姓父母祖父母年高者賜粟帛城內  
蕃客等並節級賜今年正月二十八日至閏正月二日  
宮苑諸門守捉西內立仗將士等量加改轉應內侍省  
及內防宮正等並賜勲爵常參官及諸州刺史少尹赤  
令有先得替及因病假滿百日解官并終制未授官者  
及致仕官並與進擬天下諸道州不得擅有閉糴禁錢  
務令通濟内外文武官及諸色人中任上封事極言時

政得失才有可觀別當甄獎應外色役等賜勲有差十一月制王承元首陳章疏願赴闕廷宜令諫議大夫往鎮州宣慰王澤所洽天網方恢宥過釋寃與人休泰其管內見禁囚徒罪無輕重並宜赦免

長慶元年正月辛丑郊禋禮畢御丹鳳樓大赦改元制曰朕聞自昔盛王之所以合天地諧神人莫過乎誠致其誠展其敬莫重於祭祭之大者莫大於郊廟故必躬行而心奉之然後百靈助慶萬國蒙福此帝王之孝也

我國家祖功宗德立號配天日月所炤雨露咸被孝思  
善繼聖敬允升郊丘歲奉於嚴禋宗廟時修其明薦朕  
以冲昧自獲纘承仰荷瞻命懼不克享幸天多祐俾歲  
大穰河朔底寧邊封靖謐及此元日至於上辛式遵典  
禮有事郊廟當祇見之夕感慕增懷洎大報之辰誠敬  
彌勵因體元而紀號用敷化之覃恩可大赦天下改元  
和十六年為長慶元年自正月三日昧爽已前大辟罪  
已下罪無輕重咸赦除之唯故殺人者十惡內者及官

典犯贓不在免限左降官量移近處如復資便任選亡  
官失爵不齒者量加收叙左降官及流人先有官者如  
已亡歿者各還本官天下百姓今年夏稅每貫放一百  
五十文州縣應徵科兩稅權酒錢內舊額須納見錢數  
者並任百姓隨所有段疋斛斗依常處時價送納不得  
邀索見錢度支鹽鐵戶部應納稅茶兼糶鹽中須納見  
錢者亦與時估段疋及斛斗如情願納見錢亦任穩便  
任永為常式其公私便換錢物先已禁斷宜委京兆府

切加覺察應度支鹽鐵戶部三司官吏所繇欠負元和  
十三年已前諸色錢物斛斛委本司盡底勘責如是入  
已隱欺即準條處分如緣欠折攤徵元保外可納者宜  
並與疏理諸軍使亦準此處分兩稅外不得別有差率  
刺史如違越觀察使舉奏觀察使事乖格勅刺史不得  
輒受中使及郎官御史奉使所在並不得與人事物諸  
道諸州縣宜委中書門下及觀察使刺史量閒劇形便  
可併省者事宜聞奏河北諸道管內宜各委本道團定



兩稅務令均濟河北州縣凋殘戶口未復其官各據郡  
邑大小量公事留置餘並停應諸道管內百姓或因水  
旱兵荒流離死絕見在桑產如無近親承佃委本道觀  
察使於官健中取無莊園有人丁者處多少給付便與  
公驗任充永業不得令有力職掌人妄為請射其官健  
仍借種糧放三年租稅榷酒有以分配百姓處又置酒  
店官酤并諸色榷率切宜禁斷亡官失爵放還流人有  
田莊不經沒官被人請射本官及子孫到並委却還天

下諸色人中有精通一經堪為師法者委國子祭酒訪  
擇其有課績特殊堪在朝獎者臺省官有闕宜先選擢  
自今郡守恪奉詔條清潔可紀四考與轉諸道或閑糴  
禁錢自為條約切宜禁斷其内外文武及致仕官三品  
已上賜爵一級四品已下各加一階陪位白身人賜勳  
兩轉故尚父子儀汾陽王贈太師晟贈太尉秀實各與  
一子八品官顏真卿杲卿張巡許遠南霽雲各與一子  
出身武德已來功臣子孫量加獎用中書門下及節度

使帶平章事各與一子八品正員官祖父母及父母並  
與贈官封父歿母存與邑號已贈已封者更與追贈及  
邑號禮儀使大禮使度支鹽鐵使京兆尹各與一子出  
身文武常參官并致仕官及諸道節度觀察經畧等使  
及神策等諸軍使父見存者量與致仕官母存者與邑  
號父母亡與贈官及邑號東都留守及諸道節度觀察  
經畧等使神策六軍大將軍威遠鎮國軍使各與一子  
出身陝州奉先興元功臣更賜勳爵有差身歿未經追

贈者並與追贈應緣大禮移仗宿衛御樓立仗將士普  
恩之外贈爵有差仍準舊例賜錢物二十萬四千九百  
六十端正貫大禮職掌行事官及留守等更賜勲爵及  
加階升壇殿行事官更特加一階應在城內蕃客等賜  
物有差常叅官及刺史有停替及病假解官及中制未  
授官委中書門下量才進擬其有情願授致仕官者亦  
聽天下諸色人中有賢良方正能直言極諫博通墳典  
達於教化軍謀宏遠堪任將帥政術詳明可以理人者

委有司各舉所知限今年十月到上都天下百姓高年者賜米及綿絹有差

七月壬子冊尊號禮畢御丹鳳樓宣制曰我高祖太宗化隋為唐奄宅區夏包舉海內全付子孫其何事哉彼昏盈而我勤勞也明皇承之能大其業六戎八蠻罔不貢奉繇是庶尹弛政庶吏弛刑視人不勤視道不謹燕寇勃起動無藩籬六十有七年兵革大試其何事哉據安逸而易萌漸也逮我聖父勤身振攘斬斷誅除天下

畧定曾是幽冀賜予懷來荷賴景靈丕訓不墜環歲之內  
二方平寧粵予何功時帝之力而卿大夫猥以大號加予  
眇身讓於四三益甚其請皇太后始聞其事懽然慰心慈  
旨下臨臣誠上迫祇受典禮懍乎予懷尚念昔者七十二  
君莫不升中慶成自以為堯舜莫已若也然而不為堯舜  
之行者來代無傳焉朕常推是為心不欲名浮於實今卿  
大夫謂我為文武孝德矣其將何道以輔予予其業業兢  
兢日慎一日慕陶堯虞舜之行以自

勉思文武憲章之道以自勤予苟不思無忘納誨於戲  
溢美之名既不克讓潤物之澤夫何愛焉可大赦天下  
自長慶元年七月十八日昧爽以前罪無輕重咸赦除  
之唯故殺人并官典犯贓不在限應左降官及流人未  
經量移者宜與量移近處有左降官流人本因犯贓得  
罪者宜依今年正月三日制處分京畿諸縣度支鹽鐵  
戶部欠負各疎理放免有差經戰陣之處所在州縣收  
瘞遺骸仍量事賜與槥槨兼以禮致祭李師道吳元濟

自絕於天並從誅滅念其祖父嘗事先朝墳墓所在並  
不得令人擅有毀發愛人本於省賦雖必在輕國用出  
於地財又安可闕今淮蔡并山東率三十餘州約數千  
里頒賜或踰於鉅萬給復有致於連年應河南北等州  
給復限滿處置宜委所在長吏審詳墾田并桑見定數  
均輸稅賦兼濟公私每定稅訖具所增加申奏其諸道  
定戶宜委觀察使刺史必加審實務使均平京北府亦  
宜準此其百司職田在京畿諸縣者訪聞本地多被所



繇侵隱抑令貧戶佃食蒿荒百姓流亡半在於此宜委  
京兆府勘會均配務使公平其京兆府百姓屬諸軍使  
者宜令各具挾名勅下京兆府一戶之內除已屬軍屬  
使餘父兄子弟據令式年幾合入色役者並令京兆府  
明立簿籍並同百姓一例差遣頻年已有制勅分委京  
兆府舉舊章條聞奏刑獄所繫理道最切如聞比來多  
有稽滯一拘囹圄動變炎涼自今已後宜令御史臺切  
加訪察每季差御史巡囚事涉情故或斷給不當有失

政刑具事繇聞奏其天下州縣並委御史臺并出使郎  
官御史兼諸道巡院切加察訪近邊所置和糴皆給實  
價如聞頃來積弊頗甚美利盡歸於主掌善價不及於  
村閭或虛招以奉於彊家或廣僦用資於游客若不嚴  
約弊何可除宜委度支精擇京西北應供軍糧并和糴  
院官并營田水陸運使切加訪察仍作條疏檢轄速具  
奏聞應停諸道終年勾并不許刺史上使并錄事叅軍  
不得擅離本州委御史臺切加糾舉内外文武見任并

致仕官各賜爵有差神策六軍金吾威遠皇城將士普  
恩之外各賜勳三轉大長公主長公主嗣王郡主縣主  
神策六軍金吾威遠皇城等諸軍將士統軍已下并將  
士等長行立仗及守本軍本營者各賜物有差鴻臚禮  
賓院應在城內蕃客等並節級賜物陰山貴女來迓天  
孫會玉明庭克觀盛典念吾妹之將遠於賓禮而宜加  
其回鶻公主別有賜物攝侍中讀寶戶部侍郎平章事  
杜元穎讀冊官中書侍郎平章事崔植各加一階謨冊

文官與一子正員官奉寶綬書玉冊官書寶官各加兩階進寶綬進中嚴外辦禮儀贊導押冊押寶綬昇寶冊官各加一階其餘應職掌行事官并寫制書官太常修撰儀注禮官并內定行事中使三品已上賜爵一級四品已上加一階仍並賜勳兩轉鑄造玉冊并填金字造寶裝寶官等各賜物五十段尊師重傅有國嘗經李逢吉韋綬薛放丁公著等普恩之外各加一階如已至三品四品者賜爵一級天下百姓年九十已上委所在長

吏量加存問孝子順孫義夫節婦先以旌表者亦量加優恤五岳四瀆名山大川并自古聖帝明王忠臣烈士各令所在以禮致祭

二年十二月乙未帝以疾痊平勅在京諸司疏放繫囚癸丑制曰朕上奉宗祧下臨邦國承烈祖垂鴻之慶當累聖奕葉之尊祇膺寶圖敬守丕業體明離立象之重表青宮建嗣之崇元良以貞國本斯固皇太子湛恭孝溫文生知夙稟日者春闈尚曠東序未興朕常訓以義

方舉明嚴敬匪資調護已達詩書克保承休爰當主壘  
膺茲典禮慶感良深踐位少陽允孚明命用弘惠澤庶  
洽兆人自長慶二年十二月二十日昧爽已前天下應  
罪合死除犯賊降從流罪已下遞減一等左降官及流  
人並與量移亡歿者任歸葬文武常叅官及諸州府長  
官子為父後者賜勳兩轉緣冊太子攝太尉稱賀攝侍  
中承旨宣制進中嚴外辦攝中書令讀冊授冊各賜爵  
一級其行事職掌官及書寶弘冊寶拜舉冊寶禮儀使

禮官等三品已上賜爵一級四品已下加一階撰冊文  
官特加一階仍並賜物有差導引官各加一階鑄造冊  
寶及禮生等賜勳有差文武常叅及陪位官并宗子諸  
親賜勳一轉景王府官量與進改夫師賢友善庶發清  
明習近性遷必資弘道所以慎簡師傅用保元良具太  
子侍讀宜委中書門下精擇二人具名聞奏

敬宗以長慶四年正月丙子卽位三月壬子御丹鳳樓  
大赦天下自長慶四年三月二日昧爽已前大辟罪已

下罪無輕重常赦所不原者咸赦除之左降官縱元勅  
云終年不齒者亦與收錄諸色得罪人先有勅云縱逢  
恩赦不在免限並別勅安置者亦放還京畿諸縣應今  
年夏青苗錢並宜赦免秋青苗錢并河南府夏苗錢每  
貫放二百文其京兆府路所放青苗錢外更放錢五萬  
貫斛斛五萬石河南府除所放青苗錢外亦更量放錢  
三萬貫斛斛三萬石其天下常貢之外更不得別有進  
獻縱節度觀察使入朝亦不得進奉諸道監軍自今後



在本道并入奏並不得進天下所貢奇綾異錦雕文刻鏤一事已上有涉踰制者悉斷至於喪葬嫁娶車馬衣服事關制度不合踰越委中書門下明立科條頒示天下有不守者御史臺及出使郎官御史嚴加訪察節級科處其六宅十宅諸王女宜令每年於選人中擇端良者降嫁老宮人及殘病不堪使役并有父母羸老疾病者並委所司選擇放出鷹犬之類本備蒐狩委所司量留多少其餘並解放仍勒州府更不得進來宮禁經費

及乘輿服膳委所司起今年三分其本色物價及水陸脚價一半委度支收管一半便任本州收充助貧下戶闕額稅錢其元和已來兩河節度使全家歸闕者如張茂昭王承元程權劉聰田弘正等五家在本道日所有債負并有異於法制之事被人言訴者一切不得為理仍各與一子正員官天下州府財物有餘羨者委觀察使及所管州郡約舊事費用者條件繇中書門下便差官類例詳定可留可去者聞奏務從寬濟勿使難守其

餘羨錢非兩稅外徵率並不用勘問自今已後州府所  
申戶帳及墾田頃畝宜據見徵稅案為定後與戶部類  
會具單數聞奏仍勒五年一定稅如有逃亡死損州縣  
須隨事均補亦仰年終申戶部如有隱漏委御史臺及  
所巡院察訪聞奏天下兩稅及諸色榷糧稅等錢弊重  
輕須有損益亦委中書門下條疏聞奏諸道除正勅率  
稅外不得擅有諸色榷稅涉擾人並宜禁斷其軍屯營  
種有侵占丁田課役稅戶者宜委御史臺切加訪察仍

限勅到一月內每道各具所還州縣頃畝分析聞奏其  
諸軍先擒獲吐蕃生口配在諸處者宜委本道資給放  
還本國天下諸州府縣官吏應行鞭捶本罪不致死者  
假以責情致令殞斃每念於此良增惻然宜委御史臺  
及出身郎官御史等切加察訪仍具事繇聞奏天下諸  
邑人中有賢良方正能言直諫經術優深可為人師詳  
閑吏理達於教化軍謀宏遠堪任邊將者委常叅官并  
諸道節度觀察使諸州刺史各舉所知限來年正月到

上都其所在淫祠不合禮經者並委長吏禁斷

寶歷元年正月辛亥祀昊天上帝於南郊禮畢還御丹鳳樓大赦天下改長慶五年為寶歷元年正月七日昧爽已前大辟罪已下罪無輕重已發覺未發覺已結正未結正繫囚見徒常赦所不原者咸赦除之官典犯贓不在此限左降官自長慶四年三月三日制後未量移者並與量移近處已經量移者更與量移常叅官及諸州刺史有先因停替及病解假官并制未授官者委中書門下

量才進擬諸州先擒獲吐蕃生口配流諸處者委本道  
資給放還邊上仍不得更受投降人并擒捉生口天下  
諸色人中能精通一經堪為師法者委國子祭酒訪擇  
其名以聞天下州縣各委刺史縣令招延儒學明加訓  
誘大理寺官比來吏部所授多非其才宜令精選有志  
行詞學兼詳明法律者注擬其課績特殊堪任朝獎者  
臺省有關宜先選擇如聞去冬吏部所選人駁放者衆  
或文狀乖錯或書判差池主司守文不得不爾既施惠

澤亦在霑恩其長名及雜駁選人如有未離京城者委吏今月內簡勘除涉踰濫者餘并却收以比遠殘闕注擬如不情願不可彊之朕卽位之初已有赦令至如損撤服御止絕他獻限喪葬以息淫費禁竒靡以專女工他徭擅賦閉糴禁錢吏行姦欺人曷依庇僧道踰濫流貶重輕錢弊利害軍屯侵占車馬衣服之制未幾廢格已多或職司惰慢而不能將明或詔書纒行而已下不守以此求理不亦難乎其元和已來詔并長慶四年三

月三日赦令有委廢不行事在朕躬者諫官直言得失無有所隱其在臺閣者左右承據詔條勘舉具事繇聞奏刺史縣令已後無過犯未滿三周年不得除替如理行尤異但議就如其有才宜他職灼然章著者中書門下先具事繇及授上年月奏聽進止

四月癸巳冊尊號禮畢大赦天下自寶歷元年四月二十日昧爽已前大辟罪已下罪無輕重咸赦除之左降官已經量移者宜與量移近處京百司職田散在畿內



諸縣舊制配地出子歲月已深佃戶致有流亡官曹多  
領虛數欲令據額均入地盤萬戶供輸百司盡得隨稅  
出子逐畝平攤比量舊制孰為允便宜委京兆時與屯  
田審計會條流聞奏如聞京城諸司捕繫推鞠動經旬  
時每季御史巡囚罕能舉劾積成寃滯為弊頗深宜重  
舉明長慶元年七月十八日赦件聞奏京畿百姓多屬  
諸軍諸使或戶內一人在軍其父子兄弟皆不受府縣  
差役項者頗有制勅等分如聞尚未遵行宜委京兆府

亦舉明前後條制聞奏内外文武見任及致仕官賜爵  
加階有差

文宗太和元年正月乙巳御丹鳳樓大赦天下制曰朕  
聞古先哲王之為理也修己以安百姓恤刑而矜庶獄  
端立政以謹始弘厚澤以體仁推其禮以及於物誠於  
中而化於外和氣斯洽休徵以臻故兵革不試而四海  
寧疵癘不作而三靈泰我有唐祖武宗文光宅天下列  
聖承統遂康區中漸濡丕冒掩軼前載弘茲道以騰英

聲煥其文以耀終古惟此鴻業屬予冲人荷無疆之丕  
構託於兆人之上晝惕宵傲怒焉如疾抑惟宗社儲休  
神祇協力克靖內難恢復皇綱思布和以立極爰正風  
於更始因體元紀號之典舉肆眚覃恩之命昭我恤隱  
與人惟新可大赦天下改寶曆三年為太和元年正月  
十三日昧爽已前大辟罪已下罪無輕重已發覺未發  
覺已結正未結正見繫囚徒常赦所不免者咸赦除之  
惟十惡五逆及故殺人官典犯入已贓不在於免限左

降官量移近處已經量移其合復資者五品已上中書  
門下速與處分六品已下任從常例選丁憂去任在憂  
未赴貶所者服闋日亦與量移如有親故在上都任經  
本司陳狀不必更待州府申請流貶之中縱勅不量許  
多者及言終身勿齒者亦與例依處分亡官失爵各與  
收叙痕累禁錮並從洗滌其緣去年十二月八日坐累  
流隸者不在此限應緣山陵制度及喪儀禮物宜委中  
書門下及諸司長官轉詢故實務遵禮度必誠必信副

朕哀懷所緣山陵造作及橋道置頓所資並以內庫錢物充用如不足以度支戶部錢充京兆府今年夏稅青苗量放一半太皇太后第二等已上親大行皇帝皇太后第一等親委中書門下量才叙用九廟子孫陪位者加兩階仍據始封每王後與一人出身委宗正卿簡尋圖譜取一房最沉翳者充數具名聞奏內外文武官及諸色人任上封事極言得失無有隱諱天下諸色人中  
有賢良方正能直言極諫者及經學優深可為師法詳

開吏理達於教化軍謀宏遠堪任將帥者常叅官及方  
牧郡守各舉所知無人舉者亦聽自舉并限來年正月  
到上都今年正月十四日上皇太后尊號及朕受冊進  
寶譔卽位冊文承旨宣制等官各與一子正員七品官  
江王府官去年十二月已前在任者並與改進其去年  
十二月九日立功將士普恩之外三品已上更賜爵一  
級四品已下更加一階其赴難軍使兵馬使都虞候將  
士等仍各與改轉名銜聞奏

是日立仗兵士南北軍合  
二萬人翰林學士並升樓

備顧  
問

六月乙卯詔曰朕聞動人以行不以言應天以實不以文蓋明誠者感通之大本也刑德者陰陽之大倫也故五事陳於洪範時令著於禮經雖堯湯之災或丁於天數而休咎之萌必徵乎人事朕祇荷大統子視兆人宵衣旻食不敢自逸猶慮上心不達於下下志不通於上是以正朝廷聽便殿訪求事之益者罔不行弊之壅者罔不去庶乎交感以致洽和而誠有所未臻應有所未

達自春及夏亢陽為害雖麥秋大稔而未歲未登京畿之間陰陽小爽齋禱備至膏澤未濡中心惻然思所以濟豈庶獄之未孚將一夫之不獲永用惕戒載懷哀矜其京畿見禁囚徒犯死罪非故殺人者並降流流已下罪遞減一等依令有司約禮禱祠宗廟徧祈山川務盡莊敬以副予志百司庶務有不便於人者各委長吏悉心陳列無使壅於下聞其寶歷二年十二月二十七日勅及今年二月十二日赦條所釐革施行未畢者宜舉



中書門下速與處分朕志唯克已誠在恤人自臨御已  
來躬行不逮乃者永虞艱食瞻仰昭回幽禱移災蔬食  
逾月益罷浮費用嚴天譴尚懼明有未燭道有未宣聞  
於神者無馨香施於理者或繆戾終夕三省履冰在懷  
內外卿士有規朕以道宜封事條奏宰衡庶尹侯衛守  
長各勵乃職庶承於天休

三年十一月甲午有事於南郊禮畢御丹鳳樓大赦天  
下四方並不得輒以雜樣難成非常之物為獻其於織

麗若花絲布繚綾之類並禁斷勅到一月機杼一切  
焚棄刺史分憂得以專達事有違法觀察使然後舉奏  
如聞州司常務巨細所裁官吏移攝將士解補占留支  
用刑獄等動須稟奉不得自尊雖有政能無所施設選  
置長吏將何責成宜委御史嚴加察訪廉使奏聽進止  
判官不能規正及刺史不守朝章量加貶降若所管州  
郡控接蕃夷軍戎之間事咨前制即不在此限

六年正月壬子詔曰朕聞天聽自我民聽天視自我民

視朕之非德涉道未明不能調序四時導迎善氣自去冬已來踰月雨雪寒氣尤甚頗傷和氣念茲庶眚或罹凍餒無所假貸莫能自存中宵載懷盱食興歎怵惕若勵時予之辜思弘惠澤以順時令其天下犯死罪除官吏犯賊及故殺人者餘並降從流流已下遞減一等應京畿諸縣宜以常平倉斛賑恤京城內鰥寡廢殘無告不能自存者委京兆尹量事濟恤具數以聞言念赤子視之如傷天或做予示此陰沴撫躬夕惕予甚悼焉

七年八月庚寅冊皇太子禮畢制曰帝者承天地貞邦  
國法明離之象固鴻業之本必命元子以備儲闡斯皇  
王之令謨古今之丕典祇受眷祐虔恭寶圖欽若彛章  
光修聖緒皇太子永幼稟仁智生知孝愛體溫文以立  
德資敏哲以保躬寬裕有常貞慎無怠妾膺盛禮俾奉  
青宮嚴宗廟主鬯之儀遵朝夕視膳之節冊命云畢感  
悅良深問安既慶於寢門布澤宜覃於天下自太和七  
年八月七日昧爽已前天下應犯死罪從流流已下遮

減一等唯官典犯賊及故殺人劫獄奪囚持杖強劫者  
不在此限左降官流人並與量移如因流貶及諸色得  
罪人所在亡歿並許歸葬宗周之盛實在於維城二漢  
之隆亦繇於磐石自開元已後累聖子孫皆長於深宮  
罔知稼穡曾不得習詩書以修禮樂交氣類以叙人倫  
雖有間出之才莫施魯衛之政永言淪廢深疚朕懷諸  
王等宜以今年已後相次出閣宜授緊望已上刺史上  
佐觀其才能續有叙用人倫所先婚禮為重笄年許嫁

則有明文其十六宅諸縣主等宜選良偶以時出適仍  
委吏部乃於諸色人中選簡令具名聞奏漢代用人皆  
由儒術故能風俗深厚教化興行近日苟尚浮華莫修  
經藝先聖之道堙蕪不傳况進士之科尤要釐革雖鄉  
舉里選不可復行然務實抑華必有良術既當甚弊思  
其改張今寰宇人寧干戈已戢皇太子方從師傅授五  
經一二年之後當令齒胄國庠以興隆典宜令國子監  
於諸道搜訪名儒置五經博士各一人其公卿士族子

第明年已後不先入國學習業不在應明經進士之限  
其進士舉宜先試帖經并略問大義精通者次試議論  
各一道文理高者便與及第其所試賦並停其試經官  
便以國子監學官充禮部不得別更奏請弘文崇文兩  
館生齋郎並依令式試經畢仍差都省郎官兩人覆試  
卿大夫者下人之所視遠方之所倣若非恭儉克己庶  
貞化人而望其服從固不可得况朕不寶珠玉不御織  
華逮於六官皆務儉薄卿大夫得不叶朕此志率先兆

人比年所頒制度皆約國家令式去其甚者稍謂得中而士大夫苟自便身安於習俗因循未革以至於今百官士族起今年十月服冬裘已後其衣服輿馬並準太和六年二月十七日勅處分如故違制度九品已上量加黜責其布衣五年不得舉選百姓軍人各委州府長吏漸施教化使自遵行不要便為禁制令其驚擾惠養疲人本於廉吏阜其生殖在絕貪求其諸道方鎮刺史等有聚斂貨財潛行餽遺者委御史臺糾察以聞仍委




度支鹽鐵分巡院同為訪察不得容蔽親人之官切在  
守長久於其道政乃可成其方鎮刺史三考已下者不  
得輒議替換如治有異等委中書門下訪察就如寵獎  
如灼然可錄者別與甄升其或政有乖理害及百姓者  
即不在滿三考限易譏豐屋傳美卑宮雕刻礮磨先賢  
所戒近者官纔升於郎署位始至於郡符莫不高其閑  
闕廣以池榭非唯僭侈踰制實亦耗蠹傷財其百官等  
宅已造成者並許仍舊今日後如更有創立新宅及屋

室高大者並委御史臺糾彈必嚴加黜責御史臺所置  
六察分糾百司比來因循鮮能舉職起今以後諸司如  
有身名偽濫隱盜官錢及違法等事他處發覺者監察  
御史並當貶斥考課之法前王所重蓋以綜覈吏理勵  
精政途名實苟違將何沮勸宜準故事置內外知考使  
兼令中書舍人給事中各一人監考百姓困窮弊繇奸  
吏政苟不擾人皆自安其司農寺宮供內及諸厨冬藏  
菜並委本寺自供其菜價仍委京兆府約每年時價支

付更不得配京兆府和市其諸陵守當夫宜委京兆府以價直送陵司令自顧召並不得差配百姓應寒食雜差配及樹栽修橋柴木選場棘等便於本戶稅錢內剋折不得更令和市天下諸州府應納義倉及諸色斛斗二合耗外切宜禁斷仍委度支鹽鐵分巡院及出使郎官切加訪察其義倉斛斗先有借用處委戶部勾當並須及時填足文武常叅官及諸州府長官子為父後者賜勲兩轉應緣冊禮行事官賜爵加階加勲并賜物有

差魯王府官未經進改者量與進改其皇太子侍讀宜  
委中書門下精選二人具名聞奏天下孝子順孫先旌  
表門閭者及高年廢疾者委所管州縣各加存恤



冊府元龜卷九十

欽定四庫全書

子部  
冊府元龜卷九十二

詳校官中書臣瞿照

員外郎臣牛稔文覆勘

總校官庶吉士臣何思鈞

校對官中書臣徐步雲

謄錄監生臣官懋弼

欽定四庫全書

冊府元龜卷九十一

宋 王欽若等 撰

帝王部

赦宥第十

唐文宗太和八年二月庚寅詔曰朕祇若天命續承睿  
圖正統紀以清四方序彛倫以貞百度慄慄寅畏于茲  
九年雖儉已飭躬推誠育物懼有未至不遑晏寧屬節  
氣交時疾恙嬰體列聖垂祐洵復初既上慶於兩宮

宜覃恩於兆庶思與寰宇同茲福祥自太和八年二月九日昧爽已前天下應犯死罪降流流已下罪遞減一等唯官典犯贓及諸色所繇破用官物故殺人十惡等罪不在此限左降官流人宜準去年八月九日勅即與處分為政之要必在去煩厚下之恩莫先已責應度支戶部鹽鐵積欠錢物或囚繫多年資產已盡或本身淪歿展轉攤徵簿書之中虛有名數囹圄之下嘗積滯寃言念於斯所當矜恤其度支戶部鹽鐵應有懸欠委本



司具可徵放數條流聞奏不得容留奸濫京諸司使食  
利錢已納利計五倍已上者本利竝放其有攤徵保人  
納利兩倍已上者其本利亦竝放免京邑之內本無攤  
酤屬貞元用兵之後費用稍廣始定店戶等第令其納  
權况萬戶所聚私釀至多禁令旣不可施權利自無所  
入從立課額殊非惠人其長安萬年兩縣見徵榷酒錢  
一萬五千一十貫八百文若先欠者竝宜放免其榷酒  
錢起今亦宜停比者滄寇干紀稽誅數年諸道興師竝

獻戎捷時方討叛難議釋縛免死戍邊已有恩貸今滄  
州一道久被朝章念其懷土之心必有向隅之歎俾之  
遂性用洽優恩其諸道所送滄州將健配流及邊鎮營  
田役死者竝委諸道據見在人放歸本管如有已效軍  
職及自有生業不願去者亦任便住董昌齡自邕州累  
平溪洞兵威所向首惡皆擒言念蒼生無非赤子况在  
荒徼尤當撫循其溪洞如有未歸附者向後非因侵擾  
更不用進討仍加存撫各使懷安所獲黃洞百姓竝分

配側近州縣令自營生不得沒為奴婢將充賞給如元  
是奴婢者即任充賞南海蕃船本以慕化而來固在接  
以恩仁使其感悅如聞比年長吏多務徵求嗟怨之聲  
達於殊俗况朕方寶勤儉豈愛遐琛深慮遠邇未安率  
稅猶重恩宥矜恤以示綏懷其嶺南福建及揚州蕃客  
宜委節度觀察使除舶脚收市進奉外任其來往自為  
交通不得重加率稅天下諸州府如有寃滯未申宜委  
御史臺及出使即官察訪聞奏朕百靈所祐獲遂痊和

虔奉神休敢忘昭報其五岳四瀆天下名山大川委所  
在長吏致祭仍豐潔以副精誠朕以寡德上承丕構宗  
社流慶玄穹叶靈微恙愆和旋就康復渥澤思及於人  
瘼儆戒先自於朕躬俾我華夷共歡富壽中外臣庶宜  
體予懷

十二月己卯詔曰王者愛人如身推己及物恤其寒燠  
之苦適其舒慘之宜俾協太和用臻至理朕恭默思道  
憂勤在懷時屬嚴冷念深徽纒當霜雪之候滯囹圄之

中饋餉為勞逮捕斯擾沍寒所迫愁難必多惻然疚心  
思有矜降宜布在寬之令使無留獄之嗟應京百司及  
畿內諸縣見禁囚徒應犯死罪特降徒流流已下者遞  
減一等如欠官錢情非巨蠹責保填納不要禁繫唯故  
殺人者及官典犯贓不在此限仍委京兆府及諸司官  
長制下日當速疏決聞奏朕司牧黎元存誠寰宇况封  
甸殷廣京師浩擾憫觸法以罹辜式加恩而宥罪庶亡  
無告寧失不經宣示中外令知朕意

九年十二月丁亥詔曰朕以翼翼之心孜孜求理十年之內庶政未凝極其焦勞志在博採聿觀竒士冀獲長才取其節焉不顧發迹故李訓鄭注咸得進言望其沃心每許造膝邪人奸色順非而澤信行聽言深心厚貌包藏不詐偽辨無疑梟獍為心禍亂竝作志欲剪除中外悉去大臣志願非常謀安太過上天垂祐宗社降靈同惡雖多姦謀竟敗忠臣輸力保護朕躬是曰彌寧已嘗布告尚聞閭里未悉予心猶有浮言謬相誑惑朕君

臣之際疑間不行致此妖妄慙非哲惠前月二十一日  
王涯賈餗舒元興李訓鄭注李孝本韓約羅立言王璠  
郭行餘魏逢等親率金吾兵仗又郭行餘王璠潛領所  
部將健持兵上殿叶謀不軌傾覆社稷謀害中外凡此  
凶徒悉已梟戮絕其遺類以謝忠良內外庶臣卿士百  
辟體予前志宜即自安無惑浮言尚相恐怖且布維新  
之慶宜申在宥之恩京百司見禁囚徒死罪遞減一等  
未結正者推問畢日準此處分諸色所繇官吏陷於脅

從雖有名籍涉於誑誤者一切不用更問仍付左右神策兩金吾京兆府御史臺竝準恩赦處分休便追捕其有潛藏迴避限令出三日各歸本司逆人親族已處置外其餘周親已上一切不問所在更不用繫留聞報其先有定名捕捉者所在尋追獲日奏聞不得漏網昨者有擅入逆人家盜掠財物擁無故之利生怙亂之心尚有縱酒聚徒妖言惑衆志於掠盜恐嚇居人假託軍司輒持兵器及以前月二十一日事妄相告訐者委御



史臺京兆府嚴加伺察擒捉奏聞所在集衆決殺不在  
恩赦之限於戲齊晉之難桓文是興注訓之妖朕志先  
定識邪正之路辨消長之端覩衆臣宣力於急難見禁  
旅摧兇於頃刻當時危急之際識臣節之勤藏于予心  
何日可忘宣示中外宜體朕懷

開成元年正月辛丑朔帝常服御宣正殿受朝賀禮畢  
大赦天下詔曰朕以寡昧祇奉昌圖兢業為心不敢自  
怠庶乎播祖宗之光烈致區宇之康平推誠不疑唯才

是用豈謂兇姦背德宗社將危中外叶謀咸加顯戮知  
人則哲實在帝而猶難罪已興懷誠為君之不易緬慙  
古理良用惕然是用因元正御正殿先明首罪仍布鴻  
恩王守澄累朝獎任久掌禁軍忠力雖多愆誤難掩交  
通雜累延進奸邪專弄威權蠹害時政鄭注李訓因緣  
引見忝竊恩榮二三舊臣陷在非罪成予憂昧抑有其  
繇遂使姦惡構連竊起前殿王涯賈餗舒元興宰輔股  
肱叶謀不軌王璠郭行餘節將在京率兵上殿羅立言

李孝本紀綱臺府深入領徒韓約誘金吾衛兵立成嚮  
背魏逢驛騎來往鄭注自出成師將相通謀情狀咸具  
上天降祐氛祲已清討其本因已正刑辟王守澄既已  
云亡難議深責自特進已上官爵及實封竝宜削奪禍  
已終於既往恩宜覃於有截可大赦天下宜改太和十  
年為開成元年正月一日昧爽已前大辟罪已下罪無  
輕重常赦所不原咸赦除之其左降官量移復資及才  
用有足稱者中書門下處分貶流人中元勅不許量移

及終身勿齒者竝與量移其去年應緣朋黨連累並十一月二十一日坐罪流貶者不在此限其身亡伏法者委所在州府量給棺殮任所親叔姪制服其戶部度支鹽鐵應有諸色欠負太和五年已前者竝放免諸色賀正端午降誕賀冬進奉起今權停三年其錢充紐放百姓兩稅所在除藥物口味茶果外不得輒有進獻百司及諸道應宣索製造一物已上者竝同三年京畿百姓兩稅已下凡一歲之內徵取者并百官職田竝全放一

年其京兆府一年所支用錢物斛斗草等竝勒鹽鐵使以開成元年夏青苗錢同州河中絳州去年旱歉賦歛不登宜放開成元年夏青苗錢同州賜雜穀六萬石河中絳州共賜十萬石委度支戶部以見貯粟帛充賜三省九州列御史臺選黜陟使十人同問風俗進賢退不肖興行新制務令通流天下戎鎮文武帶憲官者解補進退竝須奏聞其逐州令制譯語學官常令教習以達異意内外文武官及諸色人任上封事極言得失有裨

時政者必加升擢以待不次其有藏器候時隱身岩穴  
奇節獨行可激風俗者委常參官及所在長吏各以名  
聞文武之道合而兼濟勲臣子弟有能修詞務學應進  
士明經及通諸科者委有司先加獎引河朔節將以州  
縣歸國者有張茂昭田弘正程權各與一子官子弟堪  
任使者委中書門下量加引用應内外文武官進階加  
爵有差

二年三月壬申以妖星見詔曰朕嗣守丕構對越上玄

虔恭寅畏於今一紀何嘗不宵衣念道晷食思愆師周  
文之小心慕易乾之夕惕懼德不類貽列聖羞欲致和  
平時無灾咎然誠未感物謫見於天仰愧三靈俯慙衆  
彙思獲攸濟浩無津涯昔宋景發言星因退舍魯僖納  
諫饑不害人取鑒往賢深惟自勵載軫在予之責宜布  
恤辜之恩式表殷憂異答昭戒應在京城百司及天下  
州府見禁囚徒各委長吏親自鞠問罪合死者從流流  
已下並釋放唯故殺人及官典犯贓并主掌錢穀之吏

計較盜竊者不在免限揚州楚州浙西管內諸郡如聞  
去年稍旱人罹其災豈可重困黎元更加誅斂爰布蠲  
除之令用伸拯物之情宜委本道觀察使於兩稅戶內  
不支濟者量議矜減今年夏稅錢物每貫作分數蠲放  
分折速奏仍於供上及留州使額內相均落下務令蘇  
息膏澤不愆播種伊始土木興役恐妨農功禁中及百  
司所有修造竝宜權停韶陽御辰生氣方盛思全物類  
以順天時內外五方凡有籠養鷹鷄及鷄鴨狐兔等悉



宜放之起今月一日至五月三十日禁京師畿內採捕禽獸羅網水蟲以遂生成永為定制委臺府及本軍本司切加禁止唐州晝劫縣官桂州聚集妖人或始於計窮或迷於誘導嘯聚未散伏藏山林者各委本處長吏遣人宣諭恩旨便令放歸鄉貫田里俾安家業勿更相尋所犯如不從制命不在此限朕今素服避殿命太常撤樂大官減膳一日常費分為一旬近者內外臣僚繼獻表章徵引故實請冊尊號夫道大為皇德大為帝朕

膺此稱祗媿已多矧鍾星變之灾敢議名揚之美非徵  
既往且倣將來宰臣百僚及諸道節度觀察等使更不  
用奏請如表已在道路及到者竝宜却還常參官及諸  
州府長吏如有規諫者各上封事極言得失陳救災之  
本明致理之方咸竭乃心以俾厥辟於戲朕明誠未感  
化理未孚謹告在天丁寧斯甚所宜盡意與我同憂勉  
進嘉言共凝庶績弼違納誨副茲虛懷宜示內外各令  
知悉

三年十一月壬戌以妖星再見詔曰上天蓋高感應必  
繇乎人事寰宇雖廣理亂盡繫於君心從古以來必然  
之義朕嗣膺寶位十有三年當克己以虔恭每推誠於  
庶衆將以導迎休應漸致雍熙期克荷於宗祧思保寧  
於華夏而德有所未至信有所未孚災氣上騰天文謫  
見再周期月重擾星躔當求衣之時覩垂象之變兢懼  
惕勵若蹈泉谷是用舉成湯之六事念宋景之一言詳  
求譴咎之端採聽消禳之術必有精理蘊於衆情冀屈

法以安人爰恤刑而厚下應京城百司及諸道州府十一月八日已前見禁囚徒未經勅斷者犯死罪竝降從流流已下遞減一等其十惡及謀殺人劫盜賊并官典犯賊不在此限諸道今年遭水及蝗蟲州縣人戶等宜委觀察使與州縣長吏計會精加察訪勿憚奏論諸道所有進獻時新委中書門下更點勘樽減以稱朕意京畿之內百役繁興欲其阜安切在優恤其今年二月二十五日勅賑貸諸州百姓糧種粟八萬四千九百七十

八石如聞數內半是義倉斛斗此乃救災之備豐年自合收積其餘有戶部管係者竝且停徵以俟來歲畿內諸縣應有開成元年以前諸道逋欠竝宜放免仍委度支與府司同簡勘聞奏如是官吏破用不在此限皇太子葬事卜日稍近但令粗及禮制不必過務虛儀事涉繁冗則須裁減莫無害物夫豈傷恩易定兩州地理深阻近者守臣喪沒軍中初有異圖累遣詔書申明事理革心遷善章表繼來張元益出定州後應是初扶樹元

益有違朝旨者自將校至於官健委新節度使安行慰諭竝經放釋如或輒相告訐却以其罪罪之冀使藩方永無疑懼文武百寮及諸色人有能通達刑政之源參考天人之際隨在各上章疏指言得失乃至撤樂減膳抑亦舊章便當內自指揮不復更形綸翰宣示中外宜體至懷

四年十一月己亥曲赦京城及畿內死罪降流流已下者遞減一等唯十惡五逆殺人官典及監臨犯贓不在

此限

武宗以開成五年正月即位二月戊申大赦天下

會昌元年正月庚戌享園丘還御丹鳳樓大赦改元

二年四月戊寅受冊尊號大赦

五年正月辛亥有事於南郊禮畢御承天門大赦天下

六年二月癸酉制䟽理天下囚徒除官典犯贓及持杖

劫人犯十惡外餘罪逋減一等犯輕罪者并釋放京城

內仍委宰臣一人與御史中丞同䟽理兩京及天下州

府耄老惇獨及殘疾窮困交不存濟戶今年夏稅竝放免所攻討黨項事不獲已其婦人并幼小未任持兵仗者交兵日不得濫有殺傷

宣宗以會昌六年三月即位五月大赦

大中元年正月戊申享園丘還御丹鳳樓大赦改元

四年正月大赦天下徒流人比在天德者以十年為限既遇明恩例減三載使循環添換邊不闕人次第放歸人無怨苦其秦州源州威州武州諸關等所配流人須



量輕重與立年限宜令止於七年放還如有住者亦聽  
中有犯死罪及逆人賤隸不在此限諸道府州縣官員  
如請公假一月已下而權差諸廳判官一月已上即準  
勾當例其課料等據數每貫刻二百文與見判按官員  
添給有故意殺人者雖已傷未死已死更生意欲殺傷  
偶然得免竝同已殺人條處

懿宗咸通元年十一月丁未有事於郊廟禮畢御丹  
鳳樓大赦改元

四年正月庚午有事于園丘禮畢御丹鳳樓大赦

七年十一月壬申以復安南御宣正殿大赦

十二年正月戊申冊尊號禮畢大赦

五月庚申勅慎恤刑獄大易格言語曰如得其情則哀矜而勿喜而獄吏苛刻矜在舞文守臣因循罕聞親事以此械繫之輩溢於狴犴逮逋之徒繫於簡牘實傷和氣因致沴氛况時屬炎蒸化先茂育竝赦罪戾式順生成應天下所禁繫罪人十惡五逆故意殺人合造毒藥

持杖行劫開發墳墓外餘竝宜疏理釋放或信任人吏多有任情繫留續察訪得知本道觀察使判官州府本曹官必懲謹以誠慢易勅到後十日內速疏理分析聞奏

十四年四月八日迎佛骨入內道場三日後出京城諸寺制曰朕以寡德續承鴻業十有四年頃屬蠻寇猖狂王師未息朕憂勤在內愛育生靈遂乃尊崇釋教志重玄門迎請真身為萬姓祈福今觀覩之衆隘塞路陂載

念狴牢寢興在慮嗟我黎人陷於刑辟况漸暑毒繫於  
縲紲或即幽寃有傷和氣關連追擾有妨農務京畿及  
天下州府見禁囚徒除十惡五逆故意殺人官典犯賊  
合造毒藥光火持杖開發墳墓外餘罪輕重節級遞減  
一等其京城軍鎮限兩日疏理訖聞奏天下州府勅到  
三日內疏理奏聞

僖宗乾符元年十一月有事於郊廟禮畢御丹鳳樓大  
赦改元

四年正月丁丑赦天下繫囚及徒流人放還

廣明元年正月乙卯朔御宣政殿制曰朕祇膺寶祚嗣  
守宗祧夙夜一心勤勞八載實欲驅黎元於仁壽致華  
夏之昇平而國步猶艱羣生寡遂災眚荐起寇孽仍臻  
竊弄干戈連攻郡邑雖輸降款未息狂謀江左海南瘡  
痍既甚湖湘荆漢耕織屢空言念疲羸良深軫惻我心  
未濟天道如何賴近者嚴勅師徒稍聞勝捷皆列聖之  
潛祐寧非德以言功屬節變三陽日當首歲乃御正殿

爰命改元况及發生是宜在宥自古繼業守文之主握圖御宇之君必自正月吉辰發號施令所以垂千年之懿範固百代之洪基莫不繇斯道也可改乾符七年為乾明元年近日東南州府頻奏草賊結連本是平人迫於饑饉驅之為盜情不願為委所在長吏子細曉諭如自首歸降保非詐偽便須撫納不要勘問如未倒戈即時剪撲東南州府遭賊之處農桑失業耕種不時就中廣州荆南湖南盜賊留駐人戶逃亡傷瘡最甚自廣明

已前諸色稅賦宜令十分減四其河中府太原府遭賊  
寇掠處亦宜準比吏部擢選人粟錯及長名駁放者除  
身名踰濫欠選考外竝以比遠殘闕收注入仕之門兵  
部最濫全無根本頗壞紀綱近者武臣多轉入文臣依  
資除授宜懲僭倖以辨品流自今後武官不得轉入文  
臣選改所異輪轅各適秩序區分其內司不在此限  
中和元年七月丁巳帝在蜀御成都府解大赦改元  
光啟元年三月丁卯帝自蜀還京已巳御宣政殿大赦

改元

五月御殿受冊尊號大赦

文德元年二月壬午帝自鳳翔還京戊子御承天樓大赦改元

昭宗龍紀元年正月癸巳朔御武德殿大赦改元中外文武臣僚進秩頒爵有差

十一月辛卯祀圜丘禮畢御承天門大赦

大順元年正月戊子朔御武德殿受朝賀宰臣百寮上



徽號禮畢大赦改元

景福元年正月丙午朔御武德殿受朝賀大赦改元

乾寧元年正月乙丑朔御武德殿受朝賀大赦改元

二年十月丁亥制赦繫囚其節文曰其有任崇柱石位

重台衡或委以軍權或參諸宥密竟因連謗終至禍名

鬱我好生嗟乎強死應大順已來有非罪而加削奪者

竝復官資其杜讓能西門君遂李周潼已下竝與昭雪

還其爵秩韋昭度頃處台司每伸相業王行瑜求尚書

令獨能抑之致於沉寃諒繇此事李璘文章宏贍迥出輩流竟以朋黨之間擠於死地凡在有識孰不咄嗟宜竝與昭洗仍復官爵

光化元年五月己巳朔以立后大赦

八月己未帝自華州還京甲子御端門大赦改元

天復元年四月甲戌御長樂門大赦改元

三年正月己巳自鳳翔還京謁廟禮畢御長樂樓大赦

天祐元年閏四月甲辰帝至雒乙巳御光政樓大赦改

元制曰乃睠中州便侯伯會朝之路爰逢百六順古今  
禳避之宜况建鼎舊京我家舊宅輾轅通其左邾鄆引  
其新周平王之東遷更延姬姓漢光武之定業克茂劉  
宗肇葺新都祈天永命皆因否運復啓昌期或西避於  
戎狄或載殲於妖孽遭家不造布德弗明十載已來三  
罹播越亦屬災纏秦雍叛起邠岐始幸石門以避衛兵  
之亂載遷華嶽仍驚畿邑之侵憂危則矢及車輿凌脅  
則火延宮廟迨至連綿宦豎構結姦兇致劉季述幽朕

於下宮韓全誨劫予於右輔莫匪兵圍內殿焰亘九重  
皆思假武以容身唯效指鹿而威衆矯誣天憲欺蔑外  
藩行書詔以任情欲忠良而獲罪雖羣方獄牧協力扶  
持拘戎律於阻修報朝恩而隔越獨有副元帥梁王全  
忠以兼鎮近輔總兵四藩遠赴岐陽躬迎大駕辛勤百  
戰盡勦兇渠營野三年竟迴鑿輅咸鎬載新其宮闕讓  
珪絕類於闍徒方崇再造之功以正中興之運而又邠  
岐結釁巴蜀連兵上負國恩下隳鄰好焚宮烈火更延

熱於親鄰却駕兇鋒復近侵於禁苑抑又太乙游處併  
集六宮罰星熒惑久躔東井玄象荐災於秦分地形無  
過於雒陽爰有一二蓋臣洎四方同志竭心王室共誓  
嘉謀魏鎮定燕航大河而畢至陳徐潞蔡輦巨軸以偕  
來披荆棘而立朝廷剗煨燼而光輪奐左郊祧而右社  
稷肅爾崇嚴前廣殿而後重廊藹然華邃公卿僉議龜  
筮叶從甲子今年孟夏初吉備法駕而離分陝列百官  
而幸雒郊覩此殷繁良多嘉慰謝罪太廟憂惕驚懷登

御端門軫惻興感蓋以一人寡祐而萬姓靡寧工役艱  
疲忠良盡瘁克建載遷之業冀延八百之基宜覃渙汗  
之恩克俟雍熙之慶滌瑕蕩垢咸與維新可大赦天下  
改天復四年為天祐元年應依天祐元年閏四月十一  
日昧爽已前所犯罪輕重已發覺未發覺已結正未結  
正見繫囚徒常赦所不原者咸赦除之唯十惡五逆故  
殺人命造毒藥持杖行劫官典犯贓不在此限長流人  
罪無輕重一切赦免左降官與量移已經量移者更與

量移經兩度量移者便與復資縱元勅云逢恩赦不在  
量移者今亦與洗滌一例施行如所在亡歿者便許歸  
葬朝貶官前資官及父母喪服闋委中書門下先與叙  
用存樹勲庸歿留義烈宜錫子孫之澤永流苗裔之恩  
庶邀英風以光壯魄武德以來立功效節著在史策兼  
與搜訪子孫繼嗣量才叙用其近年隨全忠鳳翔迎駕  
及青州討伐身役王事者委全忠錄奏如未經追贈者  
與追贈已追贈者更與加贈有子及妻在者優與存恤

用表始終土木之工辛勤斯極樸斲既利於斤斧結構  
悉冒於梯登轉石累土剪茨就垣或簡差於軍伍或徵  
役於他州下不告勞吏皆戮力言念於此先布爾恩應  
修都邑工匠人夫軍將節級軍人百姓等共賜錢一十  
萬貫以見在東都諸道上供物充委全忠分給其軍將  
仍委具名銜聞奏量材酬獎天旋日轉取象神明雷震  
電昇蓋資儀衛稱警前導清蹕至都楯帳赫奕於行宮  
旂纛披靡於長路建茲班仗整肅無虧稟教揚威宜膺



賞賚應自陝州執掌儀仗隨駕馬軍及樓下立仗將士  
等共賜錢五萬貫以見在東都錢充委全忠分給文修  
紀律武靜艱氛當予建國之辰體爾榮家之志大頒蠟  
印用慰泉扃應内外文武常參官已上及節度觀察防  
禦刺史竝與追贈追封先已有者更加封贈務表哀榮  
漢宗蕭何周師呂望不有人傑孰拯屯危况茲定鼎之  
方甫爾建侯之所嘉其勲德一何巍哉迴天再造竭忠  
守正功臣守太尉中書令宣武護國宣義天平等軍節

度使諸道兵馬副元帥知府事判六軍諸衛事梁王全忠四溟偉量五嶽竒姿挺將相之兼才行公侯之全孝迎鑿岐邑忠貫於神祇作輔鳳池智周於今昔副予愛子仍董衛兵既久而稱芳見多多而益辦一昨痛思國難首建良謀追周官卜雒之規述殷后遷都之策故得會盟咸萃遐邇遑臻分功盡稟於指縱表位悉歸於心匠躬勤巡撫頰散財糧荷畚鍤以駢羅執斧斤而翕習千門萬戶化雒宅之新宮三署六軍踰西京之舊制

人謀既叶天祐相扶俾我耿躬享茲垂拱策勲之典別  
降麻制處分睠惟良帥活濟疲民果因富庶之基遂創  
繕修之事表得人之斯理見有開而必先叶節元勲賚  
爾同德東都留守祐國軍節度使檢校太師兼中書令  
河南尹張全義保釐泉雒二十餘年惠行而藹若春和  
令簡而煦猶愛日珪璋特達桃李無言勸勤靡憚於身  
先敬善每聞於國事宮商迭應杞梓相扶誅茅棘為平  
坦之田變黍離為垣墉之峻役均甸服莫不子來夙駕

而勤陝宮載星而營新殿講論勲績實謂亞焉報功之  
典別降麻制處分國有大慶先及輔臣僉同既賴於經  
綸夙夜頗勤於扈從道途久次已聞啓沃之言朝闈方  
新更佇謀猷之力裴樞等宜與進改別降麻制處分凡  
營都邑宗廟為先非託良臣孰能盡禮魏博節度羅紹  
威經文緯武本孝資忠奉三百年之威靈構十二堂之  
棟宇將親禘祫式魏崇嚴獲展烝嘗預懷悽感天屬所  
蔭百代無踈矧我居新尤宜共樂鎮冀節度使王鎔代

延勲戚躬尚禮儀採恒獄之瓌椽製棠華之廣第內列  
雍和之殿外開朱戟之扉用弘友愛之風切慰睦親之  
思行鑿所駐供億攸難淹留將及於十旬忠敬備傾其  
任土陝州節度使朱謙驛驅得路鵬鷄逢秋識將臣事  
君之儀導季父扶天之業仲春迎蹕西自於闕鄉閏夏  
撰行東及於都界饋獻有豐於國制贍濟盡費其家財  
卓立茂功宜膺異賞竝別降麻制處分伏念明祖之幸  
蜀都服闋則恩施父老代祖之駐陝服迴鑿乃澤布州

閻德祖之巡梁州冲人之省華郡前則以興元列號後則以興德標名矧乃甘棠抑惟右鎮俾新稱謂用慰藩方宜追列聖之舊文兼循往年之近事宜改陝州為興唐府長史為尹其所置官屬一準興元等例其將士等仍賜錢三萬貫充優賞委所司遂便支給其潞州節度使丁會左創文昌之省右新執憲之臺軍令嚴明興功迅速河陽節度使張漢瑜宵程來覲兩舍不歸問彼春芳躬巡板築宮庭馳鞠蓋閱驍才王處直遠罄規模備

周場殿則有留陽上相獻嵐谷之瓌材浙右元侯貢夏  
金之三品咸鎬緝繕完之政荆襄開水陸之途豫章傾  
尊獎之心鄂渚竭忠貞之懇潭桂守弭兵之畧甌閩勤  
納貢之儀夏川孤立以安邊朗陵兩州而效悃嶺表則  
番禺盡節海濱則青社自新交馳陝澠之途竝集澗灑  
之闕嗟朕非德何以致茲履薄臨深莫申兢畏其諸道  
藩鎮牧守竝委中書門下等其功績進改處分禮儀使  
御營使各與進階執政乖方自罹衆怒任使斯久忍忘

舊恩故太子少傅崔裔頃者朕在下宮實輸忠節後全忠迎奉又罄裨謀不慎滿盈據投於覆餗今逢曠蕩興念於遺簪宜復本官階爵準天福四年正月十四日已前從別勅處分夫為下不二為上不疑適當樹鷄之辰將陳刑馬之誓咨爾藩岳敬聽朕言敦好睦鄰諸侯大義興兵動衆有土深灾居人不保室家戰士身膏草野為人上者何所忍焉恃安者危逞欲者敗齊桓葵丘之會但整衣裳晉文踐土之盟唯論職貢古賢雖遠仰止



何殊如有隣境自相攻討情理不可容者先具奏聞朝廷為平其事理若不用王命擅舉兵者委諸道共伐之含垢匿瑕國君所尚雷驚雨洗域內斯同乾坤盡欲其包容日月不私於炤耀其有負江山之固納奸諂之謀雖恣猖狂或思改革禹誅後至予不忍為舜用舞干竊所景慕如其執迷不悟長惡不悛國有刑章非朕能捨禍福二事審自擇焉李茂貞楊崇本頃朋閣孽罪已貫盈近抑強鋒謂知大德喘息纔緩翻覆如初嘗懷梟

獍之心欲恣豺狼之噬劫脅羣下安忍不臣此而可容  
是隳王法即宜經畧進討然念彼一境獨困凶殘罪止  
二人之身其下竝許立功自贖俟績處分人倫之間天  
性或異特起因心之孝獨堅匪石之貞方遷國於土中  
貴廣教於區內應天下有孝子順孫義夫節婦事績彰  
顯為衆所知者仰所在長吏標錄聞奏當與旌表門閭  
將安疲瘵須委循良共理者太守之能親人者縣宰之  
任戈鋌稍弭政術為先刺史縣令有勸課農桑招復戶

口一倍已上於前者委本道觀察使條件奏聞當加進  
陟如貪墮不理害及於人者速使停替務加葺養稱朕  
意焉思拯艱難實資材幹尚慮非常之士猶懷自進之  
嫌苟或失人焉能致理倘有懷才抱德隱遁山林武藝  
絕倫湮沉卑賤者仰所在處長吏察訪奏薦如得才實  
當待以不次之位於戲肆肯閭闔即安宮闈雖九廟几  
筵已開於新室而諸陵松柏遙隔於舊都將務又寧難  
申顧慕文武百辟執事具僚從我千里而來竭爾一心

蒞政恩覃既往效責從新方當開國之初必舉慢官之  
罰分茅邦國外相大官愍茲多難之時無與勤王之業  
協告元輔毗予一人礪山帶河敬守漢高之誓卜年與  
世希同周滿之言永安新京無忝我高祖太宗之景命  
赦書日行五百里布告天下咸使聞知

哀帝以天祐元年八月即位二年四月辛亥制以星孛  
西北赦京畿之內府縣諸軍諸使及近鎮州應有見禁  
囚徒除常赦不原者罪無輕重遞減一等限三日內疏

理聞奏畿甸之內應有暴露骸骨委所在長吏指揮以  
上供錢收拾埋瘞身沒王事者竝追贈修奉園陵役費  
夫匠車牛宜令錄奏優復一年鄉里耆耄長吏切加存  
問搜訪湮沉孝子順孫義夫節婦有司具以名聞奏必  
當旌表其鰥寡孤獨不濟者長吏量加給卹

册府元龜卷九十一